


www.BibleForChildren.org


Mataayo 8




Mbe, hano sinsikö ibhërë syaahëtirë, inyangi iya
ubhwenga yaakörrwë mu-mughi ughwa Kana, iya
mo-mokowa ughwa Ghariraaya. Mu-nyangi iya
ubhwenga muyö, nyakuwaabho Yëësu, yaarenga-mo.
Yëësu hamwë na abheegha abhaaye bhonswe
bhaarenga bharaarëk-irwë
mu-bhwenga
iyö.



Hano idivai yaahööyë, nyakuwaabho Yëësu akatëëbhya
Yëësu igha, "Idivai ebhahwërëëyë." Ho nyakuwaabho
yaatëëbhëri abhaköri abha emeremo igha, "Ghonswe
igho ghano araabhatëëbhi, mokore."



Mbe, Yëësu akatëëbhya abhaköri abha
emeremo bhaara igha, "Mwishöri amanshë
mu-sinyöngö siyö." Bhakaishörya shabhi
amanshë mu-sinyöngö siyö.



Yëësu akabhatëëbhya igha, "Bhoono
motahe amanshë ghayö, moherre
omonene uwa inyangi." Bhakakora kya
bhuyö bhaatëëbhiibhwi.



Hano omonene uwa inyangi yaawonshiri amanshë ghayö
ghaarenga ghabhaayë idivai, tiyaamanyirë hasë
ghaaruurë hë, kasi abhaköri
abha emeremo bho
mbaamanyirë hano
ghaaruurë. Mbe,
akabherekera ömötëti.




Hano ömötëti uyö yaahikirë, akamötëëbhya igha,
"Kera ömököri uwa inyangi, nkotangata arë okohaana
abhantö idivai inshiiya.

Hano bhanywa
këmwëkëmwë, ho bhoono
akoreeta idivai amaiya
ghano. Kasi uwe
öbhëëkirë idivai
inshiiya eno,
m-boono
waghereeta!"



Kiyö nkya ekemanyërryö ikya mbere
keno Yëësu yaakörrë. Ekemanyërryö
kiyö, yaakëkөрëëyë
mu-mughi ughwa Kana iya
mo-mokowa ughwa
Ghariraaya.





Ko okokora igbo, yöörökëri ubhuhika
ubhwaye, kora abheegha abhaaye
bhakamukumya.



Mbe, Yëësu akahika wa Peetero ka,
akasoha mu-nyumba. Hano yaasöhirë
mu-nyumba, akanyoora nyakubhyara
uwaabho Peetero aana ehooma ëndörö,
nkö-bhörrë arë naraayë.



Yëësu akamukunia okobhoko, akahwena, akeemoka,
akatighinkanera Yëësu.



Urusikö ruyörüyö hano Obhotooro bhwaahööyë,
ko-moghorooobha, abhantö abha mu-mughi muyö,
bhakareetera Yëësu
abharööyë abhaaru,
na bhano bhaarë na
amasambwa. Abhantö
abhaaru ukurwa
mu-mughi ghuyö,
bhakasikanera
kö-bhööri ubhwa
inyumba iyaabho
Simööni na
Anderea.



Yëësu akahwënia abharööyë abha amarööyë haghare
haghare. Ghwiki, akaata amasambwa amaru, kasi
tiyaaghatagheranga umweya ughwa okoghamba
eng'ana yoyonswe igbo, ko bhoora ngaamanyirë igba,
Yëësu m-Moona uwa Waryobha.




Abhantö bhonswe igho mbaatunanga igha, bhakuni
Yëësu, okore bhahwë nibhwi, ko bhoora obhotoro
ubhwa ukuhwënia bhonswe igho mbwaarwanga
ku-Yëësu.



Mbe, enkaagha eno yaaraarekanga eng'ana iya
Waryobha, bhakaasha-ho abhantö abhane
bhaseng'ënsirë ömöröoyë uwa risusu kwi-shambi.



Bhakataamibhwa kya bhono
bharaamuhiki ku-Yëësu, ko bhoora
abhantö m-baaru bhaarë. Bhakariina
ko-rosara urwa inyumba, hakarëngërrya
haara Yëësu yaarë, bhakarebhora-ho,
bhakaikya ömörööyë
uyö arëngë
kwi-shambi.



Hano Yëesu yaarööshë eng'ana iyö abhantö bhayö
bhaakörrë, akamanya igha
mbaana umukumo.

Akatëëbhya ömöröoyë
uyö igha, "Moona
uwaane, wabhëëywë
ëbhëbhë ibhyaho."


"Ndakötëëbhya igha,
emoka, ogheghe
rishambi iryaho,
oghende yeeka
waaho!"



Mbe, Yëësu akariina mu-bhwato na abheegha
abhaaye. Kamwë igho rikama rirörö
kai, rekahuuta ku-nyansha kuyö,
kora ubhwato bhokakerwa na
amayengo. Kasi Yëësu
umwene yaarenga
araayë.



Umwene akabhahonshora igha, "Motakoobhoha!
Umukumo ughwënyu m-moke." Ho yaamarrë akemerra,
akahamera rikama na amayengo. Inyansha
ekatendeera. Abheegha bhayö bhakaroghoora.
Bhakatëëbhania igha, "Kana!
Ömöntö ono n-wa teemo kë,
ono akohamera rikama
na amayengo
bheramwighwera?"



Waryobha
yaahanshirë
bhököng'u abhantö
bhonswe igho abha ko-kebhara kono.

Righonshe riyö, ndyo ryaaghërrë
akatoma Omoona uwaaye umumwëmwë,
aashe ko-kebhara kono, okore ömöntö
wowonswe igho ono akumukumya
atakaasira, kasi abhe na
öbhöhöru ubhwa
amakora
ghonswe
igho.



Abharuumi 3:23

Ko bhoora abhantö bhonswe igho bhaakora ëbhëbhë,
ku bhuyö amang'ana ghano bhakokora
teghakötöonia Waryobha hä.

Abharuumi 6:23

Ömöntö wowonswe ono akobha omoghorwa uwa ëbhëbhë,
ehoorohooro iyaaye, nu-ruku urwa amakora ghonswe
igho. Kasi bhëëtö, Waryobha nkotohaana arë öbhöhöru
ubhwa amakora ghonswe igho. Öbhöhöru ubhwa amakora
ghonswe igho bhuyö, tebhokohakerwa hä, kasi
nkohaanwa törë ituho iyö, ko okoghera iya okoghootana
ukwëtö na Omonene uwëëtö Kiristo Yëësu.



Abhaëbhuraania 9:27

Mbe, kya bhoora abhantö bhaatoorerwa-ho ukukwa kamwë igho, na hano ömöntö amarrë ukukwa, keno keekoroobhera, no-kobhotorrwa ikiina.

Abhaëfësö 2:8,9

N-ko okoghera iya örööbhö urwa amaabhë aghaaye, nkyo kyaaghërrë Akabhatöörya ku umukumo ghono moonagho ku-Yëësu Kiristo. Tiyabhatöörya ko okoghera igha mwaamokorra ëkëntö kyokjonswe keera, ti-igho hë, kasi iyö ni-tuho eno Waryobha yaabhahaana. Tiyabhatöörya ko okoghera iya ëkëntö ikiiya kyokjonswe keera mwaakora hë, ku bhuyö ömöntö wowonswe oora atakaihasha.



Abharuumi 10:9,10

Kora haang'ë ërë na uwe, ko bhoora hano oraaghambe na umunywa ughwaho uwe umwene igha, Yëësu m-Monene, na ukumi mo-nkoro iyaaho igha Waryobha yaamuryökëri ukurwa mo-bhaku, noraatöörribhwi na Waryobha. Ko bhoora hano ömöntö araakumi Yëësu Kiristo mo-nkoro iyaaye, ho bhoono akobharwa igha wa heene ku-Waryobha. Hano araaghambe ukurwa mu-munywa ughwaye amang'ana agha umukumo ughwaye, ho akötöörribhwa.



Yohana 3:16,17

Waryobha yaahanshirë bhököng'u abhantö bhonswe igho abha ko-kebharä kono. Righonshe riyö, ndyo ryaaghërrë akatoma Omoona uwaaye umumwëmwë, aashe ko-kebharä kono, okore ömöntö wowonswe igho ono akumukumya atakaasira, kasi abhe na öbhöhöru ubhwa amakora ghonswe igho. Waryobha tiyatömirë Omoona uwaaye ko-kebharä kono, okore abhotorre abhantö ikiina, kasi yaamötömirë, okore atööri abhantö okohetera ku-uyö.



1 Yohana 5:11-13

Keno kekoghera torabha na obhoheene ubhwa ghano Waryobha yaatötëëbhëri igha m-maheene, nö-bhöhöru ubhwa amakora ghonswe igho bhono yaatohaana.

Öbhöhöru bhuyö, ntwabhunyoora ko okoghera iya ukukumya Omoona uwaaye. Ömöntö wowonswe igho ono aana öbhömwë na Omoona uwa Waryobha, uyö naana öbhöhöru bhuyö. Kasi ono ataana öbhömwë na Omoona uwa Waryobha, uyö taana öbhöhöru hë. Mbandëkëëyë amang'ana ghayö, bhëënyu bhano mukukumya Omoona uwa Waryobha, okore momanye igha, mmoona öbhöhöru ubhwa amakora ghonswe igho.



Mataayo 8-9; Maariko 1-2, 4;
Ruuka 4, 8; Yohana 2

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: E. Frischbutter, Sarah S.

Suba Simbiti NT (ssc) © 2021, Wycliffe Bible
Translators, Inc. All rights reserved.

<https://www.bible.com/en-GB/bible/2997/MAT.1.SSC>

©2026 Bible for Children, Inc.

www.M1914.org

www.bibleforchildren.org

